

E Anti-Weihnachtsmann-Leed

Text und Musik: Albert Schneider (Orthographie angepasst)¹

- 1 Immer wann der Hervis gekumme,
 Äppel rief sin un och Prumme,
 es dä Chressdagsrummel widder draan.
 Hell en alle Großstadtstroße,
 un mer fingk dobei kein Moße,
 gletzert bunte Fitterkrom dich aan.
 Deit et dich och störe,
 do muss aan der höre,
 wie us alle Röhre schratelt et sudann:

Refrain:

„Morgen kommt der Weihnachtsmann!“
 Jung, ich mööch ene Knöppel han!

- 2 Warenhuus, ov klein Geschäfte,
 jeder mäht noh singe Kräfte
 dat Gedöns öm Chreßdagsfeschzog met.
 Wat för Kinder woren Dräumcher,
 waaden op de Dannebäumcher,
 dat verfolg se jetz op Schredd un Tredd.
 Wann de Kasse klinge,
 deit et ölig singe,
 un verloge Stemme knaatschen em Duett:

Refrain:

„Morgen kommt der Weihnachtsmann!“
 Jung, ich mööch ene Knöppel han!

- 3 Wat ganz höösch em Stall passeet es,
 zwesche Esel Schof un Stallmess,
 weed hügg met Brimborium gefeet.
 Chrestus selvs, bei su nem Krempel,
 schmess de Händler us dem Tempel.
 Su hät et der Häär uns selvs geleet.
 Doch, wat hilf dat Strigge,
 muss et evvens ligge,
 dat aach Woche vör der Zigg mer luuter hööt:

Refrain:

„Morgen kommt der Weihnachtsmann!“
Jung, ich mööch ene Knöppel han!

Aus: Sid höösch, lev Lück, sid stell! Ledcher öm et Chreßfeß
© Rheinvolk-Verlag D. & G. Kürten, Köln

Vgl.: Hoerner, Ludwig (Hrsg. - für den Verein Kölsche Klaaf e.V.) Oktober 1990. *Kölsche Mädchen, Kölsche Junge, Kölsche Tön – Kölner Liederbuch Nr. 3*. Köln: Selbstverlag.

¹ nach den Richtlinien der Rechtschreibung der Akademie für uns kölsche Sproch 2007